

# Gaoioiga Suesue 1: Mafaufau Loloto ma Faaaliga Faaletagata Lava Ia

O le a se mea ua e aoaoina e uiga i le mauaina o faaaliga i lou olaga? I le vaega muamua o le Helamana 10, ua tatou aoao ai e uiga i se aafiaga na maua e Nifae lea na ia maua ai faaaliga ma le mana mai le Atua. O le faataitaiga a Nifae ua aoao ai i tatou i le auala e mafai ai ona faateleina lo tatou gafatia e maua ma iloa faaaliga mai le Alii.

Faitau le Helamana 10:1–3, ma vaavaai mo mea na taitai atu ai Nifae i le mauaina o faaaliga mai le Alii.

Matau le upu *mafaufau loloto* i fuaiupu 2 ma le 3. Atonu e te manao e faailoga lena upu i au tusitusiga paia.

O se tasi o upumoni e mafai ona tatou aoao mai nei fuaiupu e faapea o le mafaufau loloto i mea a le Alii e saunia ai i tatou e maua faaaliga.

- E mafai faapefea ona e faamatalaina le mafaufau loloto i se tasi e le o mautinoa po o le a lena mea?
- Aisea e ono fesoasoani ai le mafaufau loloto ia i tatou ia maua faaaliga?

Na aoao mai Peresitene M. Russell Ballard o le Korama a Aposetolo e Toasefululua:



E taua le filemu ma le faalogo ma mulimuli i le Agaga. Ua tele naua mea faalavefau e tosina ai la tatou gauai atu, nai lo o se isi lava taimi i le talafaasolopito o le lalolagi.

E manaomia e tagata uma le taimi e manatunatu loloto ma mafaufau loloto ai. E oo lava i le Faaola o le lalolagi, i le taimi o Lana galuega i le olaga nei, na maua se taimi e faatino ai. (M. Russell Ballard, “Be Still, and Know That I Am God” [Faigalotu a le Ofisa o Aoga a le Ekalesia mo talavou matutua, 4 Me, 2014], [broadcasts.ChurchofJesusChrist.org](https://broadcasts.ChurchofJesusChrist.org))

- O a nisi o mea faalavefau ia e mafai ona faigata ai ona mafaufau loloto i mea faaleagaga?
- O a nisi o “mea a le Alii” atonu e te faaalaina se taimi e mafaufau loloto ai?
- O a ni aafiaga na e oo i ai pe o e iloa e uiga i le mafaufau loloto lea na taitai atu ai i le mauaina o faaaliga?

Mafaufau i se sini e mafai ona e faia e faaoga ai lenei upumoni i lou olaga. Mafaufau e faamaumau lau sini i totonu o lau api faamaumau mo suesuega.